

## **PROGRAM PEDULI RAKYAT, KASIH IBU DARUL RIDZUAN (KIDR) KHUSUS UNTUK KELUARGA GOLONGAN RENTAN**

**Ipoh, Perak 28 Julai 2021** – Selari dengan Pelan Pemulihan Negara, Program Kasih Ibu Darul Ridzuan (KIDR) akan dilaksanakan di negeri Perak oleh Pihak Berkuasa Pelaksanaan Koridor Utara (NCIA) dengan kerjasama kerajaan negeri bermula 1 Ogos 2021 untuk membantu golongan rentan yang terkesan oleh pandemik COVID-19.

Seramai 5,097 wanita serta 20,000 tanggungan dalam kalangan golongan miskin dan miskin tegar bakal menerima bantuan ini bagi mengurangkan kesan peningkatan kos sara hidup. Dari jumlah tersebut, 1,104 penerima terdiri dari wanita dari komuniti Orang Asli.

Bantuan Program KIDR diberi melalui kad tanpa tunai yang disediakan oleh Kiplepay Sdn Bhd boleh digunakan untuk pembelian barangan keperluan asas dan rawatan kesihatan di klinik swasta. Penerima bakal mendapat kad tanpa tunai bernilai RM250 sebulan selama lima (5) bulan untuk pembelian enam belas (16) jenis barangan keperluan asas. Rawatan asas kesihatan asas berjumlah RM500 setahun di klinik panel KIDR. Peruntukan untuk 5 bulan dalam tahun ini adalah RM250 untuk penerima dan tanggungan mereka.

Para peserta Program KIDR telah dipilih dan disaring dari sistem eKasih yang dibangunkan oleh Unit Penyelarasan Pelaksanaan, Jabatan Perdana Menteri (ICU, JPM) dan sistem iDamak milik Jabatan Kemajuan Orang Asli (JAKOA), di mana mereka berada di bawah Pendapatan Garis Kemiskinan (PGK) 2019.

Penyerahan Kad KIDR kepada penerima telah bermula sejak 19 Julai 2021 di seluruh 12 daerah di negeri Perak, dengan kerjasama semua Pejabat Daerah dan Tanah melalui penghulu-penghulu mukim. Penyerahan kad tanpa tunai KIDR kepada penerima Orang Asli akan dilaksanakan oleh pihak JAKOA.

Sebanyak RM7.4 juta telah diperuntukkan bagi Fasa 1 program ini sebagai manfaat penerima Program KIDR. Setiap penerima kad tanpa tunai KIDR boleh membeli barangan keperluan dari lebih 150 buah kedai runcit\* yang dilantik dan mendapatkan rawatan kesihatan dari 100 buah klinik\* berdaftar di bawah program ini. Perbelanjaan oleh penerima-penerima KIDR di kedai-kedai dan klinik-klinik panel yang dilantik akan memberi kesan limpahan ekonomi dengan menggalakkan perkembangan perniagaan runcit di kawasan tersebut (\*lantikan sedang dimuktamadkan).

Di suatu majlis yang diadakan dalam talian, Menteri Besar Perak, YAB Dato' Haji Saarani bin Mohamad telah menyaksikan penyerahan contoh kad tanpa tunai KIDR yang diterima oleh YB Dato' Ahmad Suaidi bin Abdul Rahim, Setiausaha Kerajaan Negeri Perak dari Datuk Seri Jebasingam Issace John, Ketua Eksekutif NCIA.

Dato' Haji Saarani juga telah berkata, walaupun negara masih berdepan impak wabak COVID-19, kerajaan negeri tetap mengiktiraf peranan wanita sebagai tonggak keluarga dan menghulurkan bantuan melalui program KIDR.

“KIDR diilhamkan untuk menghargai pengorbanan kaum ibu dan mengiktiraf peranan mereka dalam keluarga. Kerajaan negeri berharap penerima terpilih memanfaatkan bantuan ini sebaik-baiknya. Secara tidak langsung, program ini membolehkan penerima bantuan Program KIDR membeli makanan bernutrisi tinggi dan lebih berkualiti untuk anak-anak dan keluarga terutama Orang Asli,” jelas Dato' Haji Saarani.

Beliau juga berharap penerima bantuan Program KIDR termasuk wanita dan tanggungan dari komuniti Orang Asli akan menyertai program-program integrasi modal insan NCER seperti empowerNCER dan JomNiaga@NCER demi menjana dan meningkatkan pendapatan keluarga melalui kursus-kursus kemahiran dan asas keusahawanan serta bimbingan keusahawanan secara percuma dan pemberian peralatan permulaan perniagaan (business starter kit) untuk membantu mereka keluar dari kelompok miskin dan miskin tegar. Manakala, anak-anak penerima Program KIDR yang akan menduduki peperiksaan SPM juga layak dipilih untuk menyertai program empowerNCER-Akademik.

Ketua Eksekutif NCIA, Datuk Seri Jebasingam Issace John pula berkata, berikutan kejayaan Program Kasih Ibu Darul Aman (KIDA) di Kedah, NCIA telah memperluaskan program ini ke negeri Perak demi membantu golongan yang terkesan terutama semasa pandemik COVID-19.

Pihak NCIA mengambil pendekatan serampang tiga mata yang mana salah satu strategi adalah untuk mengutamakan pembangunan modal insan dan komuniti bagi memulihkan kembali ekonomi wilayah ini.

“Program Kasih Ibu Darul Ridzuan (KIDR) ini merupakan sebahagian dari program bantuan kerajaan untuk menangani masalah kenaikan kos sara hidup dan menampung perbelanjaan keluarga. Kami yakin melalui Program KIDR dan lain-lain program integrasi modal insan NCIA, lebih ramai keluarga dapat diperkasa dan meningkatkan status sosioekonomi mereka yang terpinggir,” tambah Datuk Seri Jebasingam.

– TAMAT –

#### UNTUK MAKLUMAN EDITOR:

##### **Berkeuaan NCIA**

Pihak Berkuasa Pelaksanaan Koridor Utara (NCIA) telah ditubuhkan di bawah Akta Pihak Berkuasa Koridor Utara Pelaksanaan 2008 (Akta 687) sebagai pihak berkuasa yang bertanggungjawab untuk menyediakan hala tuju dan untuk merangka dasar dan strategi menggalakkan dan mempercepatkan pembangunan Wilayah Ekonomi Koridor Utara atau Northern Corridor Economic Region (NCER). NCER merangkumi negeri-negeri Kedah, Pulau Pinang, Perak dan Perlis; dan diketuai oleh Datuk Seri Jebasingam Issace John selaku Ketua Eksekutif.

NCIA akan terus memacu evolusi NCER ke arah menjadi rantau sosioekonomi kelas dunia dengan memangkinkan dan melaksanakan program pembangunan nilai tambah dalam inisiatif-inisiatif strategik berimpak tinggi, terutamanya melalui Sektor Pembuatan, Sektor Perniagaan Tani, Sektor Petrokimia, Sektor Perlombongan, Sektor Ekonomi Hijau, dan Sektor Perkhidmatan (termasuk Pelancongan, Logistik dan Perhubungan; serta Ekonomi Digital).

Sila hubungi:

<b>YM Raja Dato' Zamalia Raja Mansur</b> Head, Corporate Communications Unit Email: <a href="mailto:rajazamalia@ncer.com.my">rajazamalia@ncer.com.my</a> Mobile: + 019 286 2944   DL: + 604-502 0708	<b>En. Ariff bin Ahmad</b> Head, Public Relations and Media Management Corporate Communications Unit Emel: <a href="mailto:ariffahmad@ncer.com.my">ariffahmad@ncer.com.my</a> Mobile: + 016 328 8944   GL: + 604-502 0708
---	---